

四庫全書

史部

欽定四庫全書

史部

陝西通志卷五十八

詳校官監察御史_臣劉湄

檢討_臣德生覆勘

總校官降調編修_臣倉聖脉

校對官助教_臣胡子襄

謄錄監生_臣王時發

欽定四庫全書

陝西通志卷五十八

人物四

勇略上

周

樗里子名疾秦惠王弟滑稽多智秦人號曰智囊爵右
更使伐曲沃取其城地伐趙擄將軍莊豹拔藺明年
助魏章攻楚敗楚將屈匄取漢中地秦封號爲嚴君

武王立逐張儀魏章擣里子為相以車百乘入周周

迎之甚敬昭王元年擣里子伐蒲還擊皮氏卒

史記本傳

頡弱

秦人

謂秦王曰山東之戰國有六韓天下之咽喉魏

天下之胸腹王資臣萬金而遊聽之韓魏入其社稷
之臣於秦即韓魏從而天下可圖也秦王曰善乃資

萬金使遊韓魏入其將相四國畢從

策國

陳軫

秦人

齊助楚攻秦惠王患之使張儀見楚王曰大王

能閉關絕齊臣請使秦王獻商於之地六百里楚王

大悅羣臣皆賀陳軫後至獨不賀楚王曰不穀得商
於之地六百里諸大夫皆賀子獨不賀何也軫對曰
臣見商於之地不可得而患必至也王曰何也對曰
秦所以重王以王有齊也今地未可得而齊先絕是
西生秦患北絕齊交兩國兵必至矣楚王不聽使受
地於秦張儀出見使者曰從某至某廣從六里使者
報楚王王大怒欲伐秦軫曰伐秦非計也王不如賂
之一名都與之伐齊是我亡於秦而取償於齊也王

不聽舉兵伐秦大敗於杜陵齊伐楚陳軫謂楚王曰
王不如以地東解於齊西講於秦秦王謂軫曰子秦
人也棄寡人事楚今齊楚相伐或謂救之便或謂救
之不便子獨不可以忠為子主計以其餘為寡人乎
軫曰王獨不聞夫管與之說乎有兩虎爭人而鬪管
莊子將刺之管與止之曰虎者戾蟲人者甘餌今兩
虎爭人而鬪小者必死大者必傷子待傷虎而刺之
則是一舉而兼兩虎也無刺一虎之勞而有刺兩虎

之名齊楚今戰戰必敗敗王起兵救之有救齊之利而無伐楚之害計聽知覆逆者惟王可也

國策

司馬錯

秦人

與張儀爭論於惠王前司馬錯欲伐蜀張儀

曰不如伐韓王曰請聞其說對曰下兵三川以臨二周此王業也今夫蜀西僻之國而我狄之長也敝民勞衆不足以成名得其地不足以為利臣聞爭名者於朝爭利者於市今三川周室天下之市朝也而王不爭焉顧爭於戎狄王業遠矣錯曰不然欲富國者

務廣其地欲強兵者務富其民欲王者務博其德今夫蜀西僻之國也戎狄之長也取其地足以廣國得其財足以富民繕兵故拔一國而天下不以為暴利盡四海諸侯不以為貪是我一舉而名實兩附而又

有禁暴正亂之名今周天下之宗室也韓周之與國也二國並力合謀以因乎齊趙而求解乎楚魏臣所謂危不如伐蜀之完也惠王曰善卒起兵伐蜀十月

取之

國策

錯孫臏事武安君白起與武安坑趙長平軍

還而與之俱賜死杜郵葬於華池蘄孫昌為秦王鐵
官昌生毋惲毋惲為漢市長毋惲生喜喜為五大夫

卒葬高門

漢書司
馬遷傳

犀首陰晉人名衍姓公孫氏相魏義渠君朝於魏犀首
謂義渠君曰中國無事秦得燒掇焚扞君之國有事
秦將使重幣事君之國其後五國伐秦會陳軫謂秦
王曰義渠君者蠻夷之賢君也不如賂之以撫其志
秦王曰善乃以文繡千純婦女百人遺義渠君義渠

君致羣臣而謀曰此公孫衍所謂邪乃起兵襲秦大

敗秦人李伯之下

史記張儀傳

公子池三國攻秦入函谷昭王欲割河東而講召池問之對曰講亦悔不講亦悔王曰何也對曰王割河東以講三國雖去王必曰惜矣三國且去吾特以三城從之此講之悔也王不講三國入函谷咸陽必危王又曰惜矣吾愛三城而不講此不講之悔也王曰均吾悔也寧亡三城而悔無危咸陽而悔也寡人決講

矣以三城講於三國兵乃退

戰國策

白起郿人善用兵事秦昭王為左庶長擊韓之新城為左更攻韓魏於伊闕斬首二十四萬拔五城遷為國尉涉河取韓安邑以東到乾河為大良造攻魏取城六十一與客卿錯攻垣城拔之攻趙拔光狼城攻楚拔鄢鄧五城明年拔郢燒夷陵遂東至竟陵遷為武安君因取楚定巫黔中郡攻魏拔華陽走芒卯斬首十三萬與趙將賈偃戰沉其卒二萬於河中攻韓陘

城拔五城斬首五萬攻南陽太行道絕之伐韓之野
王野王降秦使王翳攻韓上黨上黨民走趙因攻趙
趙使廉頗將堅壁待秦秦相應侯使人行反間趙因
使趙括代廉頗秦乃陰使武安君為上將軍趙括至
擊秦軍秦軍佯敗趙軍遂勝造秦壁堅拒不得入秦
奇兵二萬五千絕趙軍後又五千騎絕趙壁間趙軍
分為二糧道絕秦出輕兵擊之趙卒不得食四十六
日括自搏戰秦軍射殺括括軍四十萬降武安君盡

坑殺之韓趙恐使蘇代厚幣說應侯言於秦王罷兵
秦復發兵攻趙武安君稱疾楚使春申君及魏公子
將兵數十萬攻秦軍秦王彊起武安君稱病篤於是
免為士伍遷陰密自殺武安君死非其罪秦人憐之

鄉邑皆祭祀焉

史記
本傳

王翦頻陽人少好兵事秦始皇十一年攻趙闕與破之
拔九城二十八年攻趙遂拔趙盡定趙地為郡明年
攻燕遂定燕薊而還翦子賁擊荊荆兵敗還擊魏遂

定魏地始皇問李信吾欲攻取荆度用幾何人李信
曰不過二十萬問翦翦曰非六十萬不可始皇使李
信伐荆荆人大破李信軍始皇自馳如頻陽謝翦翦
曰不得已用臣非六十萬人不可始皇曰聽將軍計
於是王翦將兵六十萬東擊荆荆悉國中兵以拒秦
翦堅壁不肯戰日休士洗沐親與士卒同食久之軍
中投石超距翦曰士卒可用矣荆數挑戰秦不出引
而東翦舉兵追之大破荆兵至蘄南殺其將軍項燕

乘勝畧定荆地城邑為郡縣因南征百越之君而王
翦子王賁與李信破定燕齊地始皇并天下王氏功
為多二世之時王翦及子賁已死陳勝反秦秦使王

翦孫王離擊趙項羽救趙虜王離

史記
本傳

漢

重泉人李必駱甲習騎兵可為騎將漢王欲拜之必甲
曰臣故秦民恐軍不信臣願得大王左右善騎者傳
之廼拜灌嬰為中大夫令李必駱甲為左右校尉擊

楚騎於滎陽東大破之

史記灌嬰傳

魏尚槐里人文帝時為雲中守軍市租盡以饗士卒出私養錢五日一殺牛以饗賓客軍吏舍人匈奴遠避不近雲中之塞敵一入尚帥車騎擊之所殺甚衆

漢書

馮唐傳

蘇建杜陵人以校尉從大將軍衛青擊匈奴封平陵侯以將軍築朔方後以衛尉為遊擊將軍從大將軍出朔方後一歲以右將軍再從大將軍出定襄亡歙侯

失軍當斬贖為庶人其後為代郡太守卒官有三子

嘉為奉車都尉賢為騎都尉中子武最知名

漢書本傳

張騫城固人為人強大有謀能涉遠為武帝開西域五

十二國窮河源南至絕遠之國拜校尉從討匈奴有

功遷衛尉博望侯至今方外開通騫之功也

漢中士女志

按博望雖不以武功顯然奉使殊方宣揚威命開邊拓境之功不在武臣下也自騫而後歷代使臣皆倣此

趙食其殺裯人武帝立十八年以主爵都尉從大將軍

斬首六百六十級元狩三年賜爵關內侯

漢書霍去病傳

辛慶忌字子正少以父任為左校丞隨常惠屯田烏孫赤谷城與歙侯戰陷陣卻敵惠奏其功拜侍郎遷校尉將吏士屯焉耆國還為謁者元帝初補金城長史轉校尉遷張掖太守徙酒泉所在著名成帝初遷左曹中郎將至執金吾坐子殺趙氏左遷酒泉太守歲餘大將軍王鳳薦慶忌通於兵事復徵為執金吾數年坐小法左遷丞相司直後拜散騎給事中歲餘徙

為左將軍慶忌居處恭儉遭世承平匈奴西域親附
敬其威信年老卒官長子通護羌校尉中子遵函谷
關都尉少子茂水衡都尉出為郡守皆有將帥之風
慶忌狄道人徙昌陵昌陵罷留長安

漢書
本傳

馮奉世字子明潞人徙杜陵武帝末以良家子選為郎
昭帝時失官前將軍韓增奏以為軍司空令先是漢
數使西域多辱命增舉奉世持節送大宛諸國客至
伊修城時莎車攻却南道鄯善以西皆絕不通奉世

與其副嚴昌計以為不亟擊之則莎車日強其勢必危西域遂以節諭告諸國因發其兵南北道合萬五千人進擊莎車攻拔其城莎車王自殺傳其首詣長安諸國悉平威振西域遂西至大宛大宛敬之得其名馬象龍而還上甚悅以為光祿大夫水衡都尉右將軍常惠薨奉世代為右將軍永光二年秋隴西羌反詔遣奉世將萬二千人以將屯為名到隴西天子大發兵六萬餘人以助十一月羌大破斬首數十級

餘走出塞明年二月奉世還京師更為左將軍

漢書本傳

王遵字子春霸陵人少豪俠有才辨與隗囂舉兵數勸囂遣子入侍囂不從故去焉八年來歙襲得畧陽公孫述助囂攻畧陽使遵持節監大司馬吳漢遵知囂必敗而與牛邯舊故以書喻之邯歸命洛陽於是囂

大將皆降囂恚憤死

漢書隗囂傳

萬修字君蔣茂陵人更始時為信都令與太守任光都尉李忠共城守迎世祖拜為偏將軍封造義侯及破

邯鄲拜右將軍從平河北建武二年更封槐里侯與
揚化將軍堅鐔俱擊南陽未尅而病卒

後漢書
本傳

耿弇字伯昭茂陵人父況為王莽朔調連率王莽敗更
始立況自以莽所置不自安弇奉奏詣更始以求自
固聞光武在盧奴乃馳北上謁因從光武北至薊會
薊中亂光武南馳弇走昌平就況說況約彭寵發兵
弇與寇恂景丹合軍而南擊王郎斬首三萬級定二
十二縣遂及光武於廣阿光武以為偏將軍從拔邯

鄆時更始徵代郡太守趙永況勸永詣光武光武遣
永復郡而代令張翬據城叛光武以弇弟舒為復胡
將軍擊眭破之更始立光武為蕭王令罷兵時光武
居邯鄲宮弇請問說光武乃拜弇為大將軍北發幽
州兵擊銅馬高湖赤眉青犢又追尤來大槍五幡於
元氏弇常將精騎為軍鋒輒破走之光武即位拜建
威大將軍攻厭新賊大破之建武二年封好時侯三
年延岑攻南陽弇與戰於穰大破之斬首三千級岑

遁走弇從幸春陵四年詔弇進攻漁陽弇與朱祐王
常等擊望都故安西山賊十餘營皆破之時祭遵劉
喜拒彭寵寵遣弟將匈奴二千餘騎經軍都舒襲破
其衆况復與舒攻寵取軍都五年寵死天子嘉况功
使光祿大夫持節迎况封牟平侯遣弇擊富平獲索
賊大破之進討張步先擊祝阿進定濟南拔臨淄城
張步兵號二十萬弇示弱以盛其氣出戰自旦及昏
大破之弇豫置伏以待縱擊八九十里僵尸相屬齊

地悉平六年西拒隗囂八年從上隴明年與來歙分
徇安定北地諸營堡皆下之弇兄弟六人皆垂青紫
當代以為榮及况卒謚烈侯少子霸襲况爵十三年
增弇戶邑年五十六永平元年卒謚曰愍侯子忠嗣
忠以騎都尉擊匈奴於天山有功

後漢書
本傳

耿國字叔慮

弇弟

建武四年初入侍光武拜黃門侍郎七

年拜駙馬都尉愍頗丘陽翟上蔡令所在吏人稱之
徵為五官中郎將時烏桓鮮卑屢寇外境國素有籌

策數言邊事帝器之及匈奴莫韃日逐王比自立為
呼韓邪單于款塞稱藩願扞禦北邊議者皆以夷狄
情偽難知不可許國獨以為宜如孝宣故事受之令
東扞鮮卑北拒匈奴帝從其議立比為南單于由是
烏桓鮮卑保塞自守中國少爭二十七年代馮勤為
大司馬又上言宜置度遼將軍左右校尉屯五原以
防逃亡永平元年卒官顯宗後置度遼將軍左右校
尉如其議焉

後漢書
耿弇傳

景丹字孫卿灤陽人更始立為上谷長史王郎起丹將
兵南歸世祖拜為偏將軍號奉義侯從擊王郎將兒
宏等于南繇丹等縱突騎擊大破之追奔十餘里死
傷者縱橫丹還從征河北世祖即位拜丹為驃騎大
將軍建武二年定封灤陽侯秋與吳漢耿弇等從擊
破五校于葦陽降其衆五萬人會陝賊蘇况攻破弘
農生獲郡守丹時病帝以其舊將欲令強起領郡事
丹不敢辭乃力疾拜命將營到郡十餘日薨子尚嗣

徙封余吾侯尚卒子苞嗣苞卒子臨嗣臨無子國絕

永初七年封苞弟遽為監亭侯

後漢書本傳

班超字仲升平陵人有志節為官傭書常輟業投筆嘆
曰丈夫當立功異域以取封侯安能久事筆研間乎
後竇固出擊匈奴以超為假司馬將兵別擊伊吾戰
於蒲類海多斬首級而還使西域鄯善王廣奉禮甚
備後忽懈超曰此必有北國使來夜將吏士奔敵營
順風縱火斬其使鄯善王震怖納子為質固上功以

超為軍司馬令遂前功時于寘王廣德匈奴遣使監
護其國超至于寘廣德素聞超在鄯善誅滅北使大
惶恐即攻殺匈奴使者而降超龜茲王建攻破疏勒
立龜茲人兜題為王超遣使劫縛兜題立故王兄子
忠為王肅宗即位詔徵超超至于寘王侯號泣抱馬
脚不得行乃更還疏勒建初三年率疏勒康居于寘
兵一萬人攻姑墨石城破之欲因此臣平諸國上疏
請益兵平陵人徐幹願佐超五年以幹為假司馬將

千人就超先是莎車降於龜茲而疏勒都尉番辰亦反超與幹擊番辰破之八年拜超為將兵長史幹為軍司馬明年疏勒王忠反超攻忠後三年忠與龜茲謀遣使詐降詣超超叱吏縛忠斬之明年發于寘諸國兵復擊莎車莎車降明年龜茲姑墨溫宿皆降乃以超為都護徐幹為長史超乃期大會諸國王於是西域五十餘國悉皆納質明年詔封超定遠侯超久在絕域上疏願入闕超妹昭亦上書請超乃徵超還

卒長子雄累遷屯騎校尉會羌寇三輔詔雄將五營

兵屯長安就拜京兆尹

後漢書本傳

耿秉字伯初

國子

好將帥畧以父任為郎數上言兵事永

平中拜謁者僕射十五年拜駙馬都尉十六年與奉

車都尉竇固等伐北匈奴虜皆奔走不戰而還十七年

詔秉與固合兵出白山擊車師車師有前後王廷相

去五百餘里固欲攻前王秉議先赴後王固計未決

秉奮身而起衆軍遂進斬首數千級收馬牛十餘萬

頭後王惶恐走出門脫帽抱馬足降秉將以詣固其前
王亦歸命遂定車師而還明年秋肅宗即位拜征西將
軍遣案行涼州建初元年拜度遼將軍視事七年匈奴
懷其恩信徵為執金吾章和二年復拜征西將軍副竇
憲擊北匈奴大破之封美陽侯永元二年代桓虞為光
祿勳明年夏卒謚曰桓侯子冲嗣官漢陽太守
耿夔字定公秉弟少有氣決永元初為竇憲假司馬北擊
匈奴轉騎都尉三年復出河西為大將軍左校尉將

後漢書
耿弇傳

精騎八百出居延塞直奔北單于廷於金微山斬關氏名王已下五千餘級單于脫亡封粟邑侯遷遼東太守元興元年獬人寇郡界夔擊斬其渠帥永初三年南單于反使夔率鮮卑及諸郡兵屯鴈門單于遣冀健日逐王三千餘人遮漢兵夔擊其左令鮮卑攻其右虜敗走追斬千餘級建光中拜度遼將軍時鮮卑攻殺雲中太守成嚴圍烏桓校尉徐常於馬城夔與幽州刺史龐參救之追敵出塞而還後坐法免卒

於家

後漢書
耿弇傳

耿恭字伯宗

國弟廣
之子

慷慨多大畧有將帥材永平十七

年劉張出擊車師請恭為司馬破降之以功為戊己

校尉屯後王部金蒲城恭移檄烏孫大昆彌已下皆

遣子入侍明年北單于遣左鹿蠡王二萬騎擊車師

遂攻金蒲城恭乘城搏戰以毒藥傅矢射之中者視

創皆沸大驚解去恭以疏勒城傍有澗水可固乃引

兵據之七月匈奴復來擁絕澗水恭於城中穿井十

五丈不得水吏士渴乏恭乃整衣服向井拜禱有頃
泉奔出乃令吏士揚水示敵敵以為神明遂引去車
師畔與匈奴共攻恭恭厲士衆擊走之後數月食盡
煮鎧弩食其筋革單于遣使招恭恭擊殺之衆諸城
上單于大怒益兵圍恭不能下肅宗即位遣秦彭王
蒙發兵七千餘人會車師降蒙等欲引還先是恭遣
軍吏范羌迎兵士寒服隨王蒙軍出塞羌固請迎恭
乃分兵二千人從山北至城中開門相持泣明日俱

歸時尚有二十六人至玉門唯餘十三人恭至雒陽
拜為騎都尉秋金城隴西羌反恭將五校士屯枹罕
數與羌戰燒何羌等十三種皆降監營謁者奏恭不
憂軍事免官卒於家子漣為京兆虎牙都尉漣子宏
畢並為郎畢字季遇順帝初為烏桓校尉時鮮卑寇
緣邊漣率烏桓及諸郡卒出塞討擊大破之鮮卑震
怖詣遼東降自後頻出輒克獲遷度遼將軍

後漢書
耿弇傳

班勇字宜僚

超子

少有父風永初元年西域反以勇為軍

司馬與兄雄俱出敦煌迎都護及西域甲卒而還因
罷都護元初六年敦煌太守請出兵擊匈奴復取西
域勇上議宜復置護西域副校尉居敦煌又宜遣西
域長史屯樓蘭西當焉耆龜茲徑路南疆鄯善于寘
心膽北扞匈奴東近敦煌於是從勇議延光二年以
勇為西域長史出屯柳中明年正月勇至樓蘭龜茲
王白英詣勇降因發兵擊走匈奴伊蠡王于伊和谷
前部始復開通還屯田柳中四年秋發兵擊後部王

軍就大破之永建元年更立後部故王子為王又使
別校誅東且彌王更立其種人為王於是車師六國
悉平其冬勇擊匈奴呼衍王呼衍王亡走是後車師
無復虜跡後擊焉耆勇以後期徵下獄免卒於家

後漢

書班
超傳

程苞字元道南鄭人光和二年上計吏時巴郡板楯反
軍旅數起征伐頻興天子患之訪問益州計吏考以
方畧苞對言板楯忠勇立功先漢為帝義民羌入漢

中輒蒙其力東征南戰世有功勞由不料恤以致叛
亂非有僭盜能相羣殺兵臨之未必卒得不如但選
明敏太守恩信懷服自然安定矣天子從之卒如其

言後在道卒

漢中士
女志

張奐字然明酒泉人舉賢良擢拜議郎永壽元年遷安
定屬國都尉初到職南匈奴左真鞬等寇美稷東羌
應之奐壁唯二百許人聞即勒兵屯長城收集兵士
詔誘東羌共擊真鞬等連戰破之郡界以寧遷使匈

奴中郎將時休屠各及朔方烏桓同反與乃潛誘烏
桓陰與和通遂使斬屠各渠帥襲破其衆諸敵悉降
延熹元年鮮卑寇邊真率南單于襲之斬首數百級
遷度遼將軍數載間幽并清淨九年為護匈奴中郎
將鮮卑出塞去永康元年東羌先零寇關中冬羌岸
尾摩螫等鈔三輔與擊大破之三州清定賜除並不
受願徙屬弘農華陰始為弘農人建寧元年振旅而
還遷拜大司農光和四年卒年七十八

後漢書
本傳

馬騰字壽成茂陵人馬援後父字子碩為天水蘭干尉
騰性賢厚靈帝末為軍行事典領部衆討賊有功拜
軍司馬遷征西大將軍初平中拜征東偏將軍是時
西州少穀騰自表軍人多乏求就穀於池陽遂移屯
長平岸頭而將王丞等恐騰為已害乃攻騰營時騰
近出無備遂破走西土會三輔亂不復來東與鎮西
將軍韓遂結為兄弟始甚相親後轉以部曲相侵又
更為讐敵騰攻遂遂走合衆還攻騰殺騰妻子連兵

不解建安初徵騰還屯槐里轉拜為前將軍假節封槐里侯北備山戎東備白騎待士敬賢矜救民命三輔甚賴之十五年徵為衛尉騰自見年老遂入宿衛初曹公為丞相辟騰長子超不就及騰之入因詔為偏將軍使領騰營又拜超弟休奉車都尉休弟鐵騎都尉徙其家屬皆詣鄴惟超獨留

典畧

馬超字孟起茂陵人父騰徵為衛尉超為偏將軍封都亭侯領騰部曲與韓遂等相結進軍至潼關曹公單

馬會語超陰欲突前捉曹曹將許褚瞋目盼之超乃不敢動曹用賈詡謀離間超遂軍以大敗超走保諸戎率諸戎擊隴上郡縣皆應之殺涼州刺史韋康據冀城有其衆自稱征西將軍領并州牧督涼州軍事康故吏民楊阜等合謀擊超超奔漢中依張魯聞先主圍劉璋於成都密書請降先主遣人迎超超將兵徑到城下城中震怖璋即稽首以超為平西將軍先主為漢中王拜超為左將軍章武元年遷驃騎將軍

領涼州牧進封犛鄉侯卒從弟岱位為平北將軍進

爵陳倉侯

三國蜀志本傳

魏

張既字德容高陵人舉茂材除新豐令治為三輔第一
袁尚拒太祖於黎陽遣郭援高幹與關中諸將合從
既說馬騰等將兵會擊斬援首幹降後幹復反太祖
使既西徵馬騰等引兵破之騰子超反既從太祖定
關右以既為京兆尹從征張魯別從散關討叛氐代

收其麥以給軍食文帝初置涼州以鄒岐為刺史盧
水寇反帝以既代之既進軍顯美夜藏精卒為伏使
千餘騎挑戰陽退寇爭奔之因發伏截其後斬首獲
生以萬數封西鄉侯蘇衡反既與夏侯儒擊破之黃

初四年薨追謚肅侯

三國魏
志本傳

梁

杜蒯杜陵人父懷瑤少有志節梁天監中累有軍功後
又立功南鄭位梁秦二州刺史大同初魏軍復圍南

鄭懷珏命第三子疑二百人與魏前鋒戰於光道寺
流矢中其目失馬敵人交稍將至疑斬其一騎而上
馳以歸疑膂力過人使馬善射一日中戰七八合所
佩霜明朱弓四石餘力斑絲纏稍長二丈五同心敢
死士百七十人每出殺傷數百人敵人憚之號為杜
彪懷珏卒謚曰桓侯疑位西荊州刺史崩疑弟也以
膽勇稱太清二年歸元帝元帝以為武州刺史隨王
僧辯東討侯景至巴陵景遁加侍中進爵為公仍隨

僧辯追景至石頭景敗崩入據臺城景平加散騎常侍江州刺史齊將郭元建攻秦州僧辯令崩赴援大破之元建遁王琳長史陸納等反帝徵崩與王僧辯討之及納等戰於車輪大敗之納等降又與僧辯西討武陵王於硤口旋鎮邁疾卒謚曰武兄嵩岑從發嶽巖岸及弟幼安並知名岸字公衡太清中與崩隨岳陽王譽攻荊州同歸元帝帝以為北梁州刺史岸請以五百騎襲襄陽譽夜遁歸襄陽岸等知譽至遂

奔其兄南陽太守巖於廣平營遣將攻拔之獲巖岸
等斬於襄陽幼安性至孝寬厚雄勇過人與兄翦同
歸元帝帝以為西荊州刺史與王僧辯討河東王譽
於長沙平之又助徐文盛東討侯景至貝磯大敗景
將任約斬其儀同叱羅子通湘州刺史趙威方等仍
進軍大舉漢口別攻武昌景度蘆洲上流以壓文盛
幼安與衆軍大敗之會景陷郢州人情大駭文盛遁
歸衆軍大敗幼安降景景殺之龔岑之子也少驍勇

善用兵與諸父歸元帝帝以為鄖州刺史與王僧辯
東討河東王譽又隨僧辯下繼徐文盛軍至巴陵聞
侯景西上乃與僧辯等守巴陵景圍之數旬不克而
遁遷定州刺史及衆軍至姑孰景將侯子鑒逆戰龕
擊之大敗子鑒遂至於石頭景親會戰龕與衆軍大
破之論功為最又與王僧辯降陸納平武陵王及魏
平江陵齊納貞陽侯明以紹梁嗣以龕為震州刺史
吳興太守遷散騎常侍鎮南大將軍龕僧辯壻也陳

文帝銜之切齒及僧辯敗龔據吳興以拒之頻敗陳文帝軍部將杜泰私通於文帝說龔降龔然之其妻王氏曰霸先讐隙如此何可求和因出私財賞募復大敗文帝軍後杜泰降文帝文帝遣人負龔出項王寺前斬之王氏因截髮出家杜氏一門覆矣

南史本傳

康綰字長明藍田人少倣儻有志氣曾祖因為苻堅太子詹事祖穆為姚萇河南尹綰伯元隆父元撫相繼為華山太守綰仕齊為華山太守梁武起兵綰舉郡

以應天監元年除竟陵太守累遷太子右衛率甲仗
百人直殿內時堰淮水以灌壽陽假絢節都督淮上
諸軍事并護堰作役人及戰士十四年魏遣將楊大
眼揚聲決堰絢命諸軍撤營露次以待之遣其子悅
挑戰斬魏咸陽王府司馬徐方興魏軍小却十五年
四月堰成絢開湫東注又縱反間於魏魏人信之鑿
山深五丈開湫北注水日夜分流湫猶不減其月魏
軍竟潰而歸水之所及夾淮方數百里魏壽陽城戍

稍徙頓於八公山尋除司州刺史領安陸太守絢在
州大修城隍號為嚴整普通元年除衛尉卿未拜卒

謚曰壯子悅嗣

南史
本傳

馬仙琕字靈馥郢人父伯鸞宋冠軍司馬仙琕少以果
敢聞永元中累有戰功出為南汝陰譙二郡太守會
壽陽新陷魏將王肅侵邊仙琕力戰克之以功遷寧
朔將軍義師起四方多響應高祖使人說之仙琕斬
以徇持兵於江西日鈔運漕建康城陷號哭經宿解

兵歸高祖天監四年王師北討仙琚每戰勇冠三軍
當其衝者莫不摧破與諸將議口未嘗言功遷南義
陽太守累破山蠻郡境清謐遷都督司州諸軍事十
年朐山民殺琅邪太守以城降魏詔仙琚討之魏徐
州刺史盧昶以步騎十餘萬赴焉仙琚與戰累破之
昶遁走仙琚縱兵乘之魏衆免者十一二收兵糧牛
馬器械不可勝數振旅還京師遷太子左衛率進爵
為侯十一年遷豫州刺史領南汝陰太守仙琚在邊

境常單身潛入敵庭伺知壁壘村落險要處所故戰多克捷士卒亦甘為用高祖雅愛仗之在州四年卒

謚曰剛子嚴夫嗣

梁書本傳

張齊馮翊人少有膽氣為歷陽太守吏治甚修天監二年遷天門太守四年魏將王足寇巴蜀以齊為輔國將軍救蜀未至足退走齊進戍南安七年遷巴西太守十年郡人姚景和聚合蠻蜚抄斷江路攻破金井齊討景和於平昌破之十一年進假節都督益州外

水諸軍十二年魏將傅豎眼寇南安齊率衆拒之豎
眼退走十四年遷巴西梓潼二郡太守是歲葭萌人
任令宗殺魏晉壽太守以城歸款益州刺史翻陽王
遣齊帥衆三萬督南梁州諸軍迎令宗十五年魏東
益州刺史元法僧遣子景隆來拒齊帥南安太守皇
甫譔及宗範逆擊之大破魏軍於葭萌屠十餘城魏
將邱突王穆等皆降齊在益部累年討擊蠻獠身無
寧歲十七年遷持節智武將軍南梁州刺史普通四

年卒謚曰壯

梁書本傳

陳

韋載字德基杜陵人沈敏有器局起家梁邵陵王法曹
參軍侯景之亂王僧辯東討元帝以載為假節都督
太原高唐新蔡諸軍事率三郡兵自焦湖出柵口與
僧辯會於梁山景平除冠軍將軍尋授義興太守高
祖誅王僧辯遣周文育輕兵襲載載嬰城自守高祖
遣載族弟翽賫書喻載以誅僧辯意并奉梁敬帝勅

勅載解兵載以衆降高祖以其族弟翽監義興郡引
載恒置左右與之謀議徐嗣徽任約等引齊軍濟江
據石頭城高祖問計於載載曰齊若分兵先據三吳
路時事去矣今急於侯景舊壘築城以通東道轉輸
命輕兵絕其糧道則齊將之首旬日可致高祖從其
計永定元年除和戎將軍通直散騎常侍二年進太
子右衛率天嘉元年以疾去官卒於家翽字子羽少
有志操以仁孝著稱高祖為南徐州刺史召為征北

參軍尋監義興郡遷驍騎將軍領朱衣直閣尋出為宣城太守天嘉二年預平王琳之功封清源縣侯大建中卒官子宏字德禮有文學厯官至永嘉府諮議

參軍

陳書
本傳

魯悉達字志通鄱人起家梁南平王中兵參軍侯景之亂悉達招集晉熙等五郡盡有其地使其弟廣達領兵隨王僧辯討侯景景平授江州刺史高祖遣趙知禮授征西將軍送鼓吹女樂悉達受之不就高祖遣

沈泰襲之不能克齊遣慕容紹宗來攻鬱口諸鎮悉
達與戰敗齊軍紹宗僅以身免王琳欲圖東下以悉
達制其中流頻遣使招誘悉達終不從琳乃連結於
齊齊遣高岳助之相持歲餘會裨將梅天養等引齊
軍入城悉達勒麾下數千人濟江歸高祖授平南將
軍北江州刺史封彭澤縣侯世祖即位進號安左將
軍遷吳州刺史遭母憂哀毀過禮因遺疾卒謚曰孝
侯子覽嗣悉達弟廣達字遍覽少慷慨志立功名侯

景之亂與兄悉達聚衆保新蔡梁元帝承制授假節
壯武將軍晉州刺史景平加員外散騎常侍高祖受
禪授征遠將軍東海太守尋除假節信武將軍新蔡
太守隨吳明徹討周迪於臨川每戰功居最仍代兄
悉達為吳州刺史授都督南豫州諸軍事南豫州刺史
大建初與儀同章昭達入峽口拓定安蜀等州鎮時周氏
將圖江左大造舟艦於蜀并運糧青泥廣達將兵掩襲
縱火焚之以功增封仍還本鎮五年衆軍北伐畧淮南舊

地廣達與齊軍會於大峴大破之進克北徐州授都督北徐州諸軍事徐州刺史入為右衛將軍十二年都督郢州諸軍事後主即位入為安左將軍二年授安南將軍拜侍中改封綏越郡公及賀若弼進軍鍾山廣達率衆於白土崗南置陣躬擐甲胄手執桴鼓率勵敢死冒刃而前殺傷甚衆及弼攻敗諸將乘勝至宮城廣達猶督餘兵苦戰不息會日暮乃解甲面臺再拜慟哭士卒皆涕泣於是就執依例入隋廣達

愴本朝淪覆遺疾不治尋以憤慨卒

陳書本傳

北魏

韋珍

閩族弟杜陵人

父尚安西府從事珍少有志操高祖初蠻

首桓誕歸款令珍與誕招慰蠻左自懸瓠西入三百

餘里至桐栢山窮淮源宣揚恩澤招降七萬餘戶置

郡縣而還以奉使稱旨除左將軍樂陵鎮將賜爵霸

城子蕭道成民謝天蓋自署司州刺史欲以州內附

為道成將崔慧景攻圍詔珍渡淮援接珍破慧景擁

降民七千餘戶內徙表置城陽剛陵義陽三郡以處之詔珍移鎮北陽蕭頤遣陳顯達率衆來寇珍憑城拒戰殺傷甚衆相持旬有二日夜開城門掩擊之賊遂奔潰以功進爵為侯後車駕征樊郢既平以珍試守魯陽郡及高祖崩除中散大夫尋加鎮遠將軍太尉諮議參軍永平元年卒謚曰懿子續字遵彥聰敏明辯為博士李彪所稱高祖每與名德沙門談論往復續掌綴錄無所遺漏壽春內附王肅出鎮揚州請

續為長史帶梁郡太守永平三年卒肱字遵顯少有
志業年十八辟州主簿遷秘書郎中稍遷左軍將軍南
郢州刺史田夷啟稱肱父珍往任荊州恩洽夷夏乞肱
充南道別將領荊州驍勇共為腹背詔從之未幾行
南荊州事肅宗末除東徐州刺史尋遷東安將軍加
散騎常侍蕭衍遣其潁州刺史田麤喜來寇肱於石
羊岡破斬之永安二年卒謚曰宣子鴻中書舍人弟

道植中兵參軍

魏書韋
閔傳

楊播字延慶華陰人高祖結中山相曾祖珍上谷太守
祖真河內清河太守父懿廣平太守有稱績除洛州
刺史母王氏文明太后之外姑播以外親進比部給
事中詔播巡行北邊高祖親送及戶戒以軍畧與平
陽王頤出漠北擊蠕蠕大獲而還除左將軍隨車駕
南討至鍾離師回詔播領步騎為衆軍殿時春水初
長賊衆大至播以諸軍渡淮未訖賊衆圍播乃為圓
陣以禦之身自搏擊斬殺甚多相拒再宿水勢稍減

播領精騎三百歷其舟船大呼曰今我欲渡能戰者
來賊莫敢動遂擁衆而濟高祖壯之尋除右將軍後
從駕討崔慧景蕭衍於鄧城破之進號平東將軍景
明初使恒州瞻恤寒乏授華州刺史延昌二年卒於

家謚曰壯

魏書
本傳

楊椿字延壽

播弟

性寬謹授中部曹折訟公正高祖嘉之

後為梁州刺史初楊集始降於蕭鸞至是規復舊土
椿貽書集始開以利害遂領其部曲來降武都氏楊

會反假椿節冠軍將軍與軍司戶羊祉討破之秦州
羌呂苟兒涇州屠各陳瞻等聚衆反詔椿為別將討
之賊入隴守蹊自固乃緩師不進陰簡精卒銜枚夜
襲斬瞻加安東將軍正光五年除雍州刺史時涇岐
及豳悉已陷賊扶風以西非復國有椿乃鳩募內外
得七千餘人遣兄子侃率以防禦詔以本官加侍中
為行臺普泰元年為尒朱天光所害弟頴本州別駕
子叔良新安太守頴弟順冀州刺史子辯東雍州刺

史辯弟仲宣有風度才學為正平太守有能名就加
安西將軍還京之日兄弟與父同遇害弟測朱衣直
閣亦同時見害測弟稚卿大昌中為尚書右丞

魏書
楊播

傳

楊津字羅漢

順弟

本名延祚少以器度見稱延昌末拜右

衛將軍孝昌初加散騎常侍以本官行定州事賊帥
鮮于修禮起博陵定州圍急津開門出戰斬賊帥一
人殺賊數百賊退人心稍安加鎮軍將軍北道行臺

賊帥薛修禮杜洛周殘掠州境津貯積柴粟修理戰具賊每來攻機械競起又於城中廣作地道潛兵湧出置爐鑄鐵持以灌賊賊遂畏楊公鐵星津與賊帥元洪業等書令圖賊帥毛普賢洪業等感悟修禮普賢由此而死既而杜洛周圍城津盡力捍守葛榮以司徒說津津大怒斬其使以絕之余朱榮死以津為都督驃騎大將軍北道大行臺委以討胡而余朱仲遠已陷東都普泰元年亦遇害於洛謚曰孝穆津有

六子長子遁字山才性恬退年近三十方為主簿莊
帝北巡奉詔慰勞山東永安末遷征東將軍亦被害
於洛謚曰恭定播家世純厚並敦義讓昆季相事有
如父子播剛毅椿津恭謙一家之內男女百口總麻
同爨庭無間言世隆誣其為逆遣步騎夜圍其宅天
光亦同日收椿於華陰無少長皆遇害籍其家播族
弟鈞祖暉洛州刺史父恩河間太守鈞頗有幹用拜
恒州刺史轉懷朔鎮將所居以強濟稱後為七兵尚

書北道行臺卒長子暄尚書郎暄弟穆華州別駕穆

弟儉北雍州刺史儉弟寬黃門郎

魏書楊播傳

楊侃字士業

播子

好計畫襲爵華陰伯侃叔椿為雍州刺

史請為錄事參軍府州之務多所委決後蕭寶夤據
州反僕射長孫稚討之除侃為行臺左丞軍次弘農
侃白稚北取蒲坂飛棹西岸潼關之賊必望風潰散
諸處既平長安自克稚從之長安平建義初為東雍
州刺史州罷除都督鎮潼關屬元顥內逼詔率衆駐

大梁侃名發村民多縛筏間以舟楫令數百里中皆為渡勢侃等遂於馬渚楊南渡破之顓南走以功進

爵濟北郡開國公万俟醜奴陷東秦圍岐州扇誘巴

蜀亦朱天光西伐詔侃為關右慰勞大使普泰初為

天光所害

魏書楊播傳

張元亮漢中人便弓馬善戰鬪以勲封撫夷縣開國子

遷龍驤將軍

魏書江悅之傳

士孫天與扶風人以勲封莫西縣男武功太守

魏書江悅之傳

李忻榮漢中人擊尹天寶戰歿子建為清水子

魏書江悅之傳

按張元亮與士孫天與李忻榮皆以梁州附魏梁華陽太守尹天寶圍城亮等皆有戰功

周

陸通字仲明吳郡人曾祖載從宋武帝平關中

按續文獻通考

云載留鎮關中後家長安

通好學有志節文帝引為帳內督賀拔

岳為侯莫陳悅所害時有傳軍府已亡散者文帝憂

之通以為不然問至果如所策自是愈見親禮從擒

竇泰復弘農沙苑之役力戰有功又從解洛陽圍軍

還趙青雀反於長安文帝將討之以人馬疲敝不可
速行通進曰青雀等詐言大軍敗績東寇將至今兵
雖疲敝精銳猶多以明公之威率思歸之衆何慮不平
文帝深納之因從平青雀功進爵為公進儀同三司九
年高仲密以地來附通從若干惠戰於芒山衆軍皆退
惟通率所部力戰至夜乃還授驃騎大將軍遷大司寇
通性柔謹清慎自守建德元年轉大司馬薨弟逞起家
羽林監累遷驃騎大將軍開府儀同三司幹識詳明所

在著績進爵為公天和三年齊遣斛斯文略來聘詔
逞為使報之逞善辭令敏而有禮齊人稱焉為宜州

刺史有惠政東宮初建授太子太保卒子操嗣

周書
本傳

王罷字熊罷京兆人除殿中將軍稍遷雍州別駕後以
軍功封定陽子除荊州刺史梁使曹義宗圍荊州堰
水灌城不沒者數板城中糧盡罷乃煮粥與將士均
令食之出戰不擐甲冑三年義宗方退進封霸城縣
公莊帝時南秦數叛以罷行南秦州事擊捕反者孝

武西遷進車騎大將軍除華州刺史嘗修州城未畢
梯在城外神武遣韓軌司馬子如從河東宵濟襲羅
比曉乘梯入城羅尚卧未起聞閣外洶洶便袒身露
髻徒跣持一白棒大呼而出戰破之軌遁走沙苑之
役神武至城下不敢攻河橋之戰王師不利羅召城
中戰士固守軍士皆無異心徵拜雍州刺史未幾鎮

河東卒於官謚曰忠子慶遠為直閣大將軍

北史本傳

扶猛字宗畧黃土人其種落號白獸蠻猛仕梁位南洛

北司二州刺史封宕渠縣男魏廢帝元年以衆降周
文厚加撫納復爵縣男羅州刺史令從開府賀若敦
南討信州敦令猛直道白帝所由之路人迹不通猛
乃梯山捫葛備歷艱阻遂入白帝城撫慰人夷莫不
悅附以功進開府儀同三司俄而信州蠻反從賀若
敦平之進爵臨江縣公後從田弘破漢南諸蠻進位

大將軍卒

北史
本傳

蘇椿字令欽

禪弟武
功人

性廉慎沉勇有決斷魏正光中關

右賊亂椿應募討之受盪寇將軍以功累遷中散大夫賜爵美陽子大統初拜鎮東將軍金紫光祿大夫賜姓賀蘭氏後除帥都督行弘農郡事椿當官強濟特為周文帝所知十四年置當州鄉師乃令椿領鄉兵其年破槃頭氏有功除散騎常侍加大都督十六年征隨郡軍還除武功郡守進爵為侯位驃騎大將軍開府儀同卒子植嗣

北史蘇緯傳

韋瑱字世珍杜陵人曾祖度惠魏中書侍郎祖千雄略

陽郡守父英代郡守瑱幼聰敏起家雍州治中遷郢
州刺史入為行臺左丞從復弘農戰沙苑加左光祿
大夫又從戰河橋進爵為子大統八年齊神武侵汾
絳瑱從太祖禦之軍還除蒲州總管府長史頃之以
望族領鄉兵進車騎大將軍瑱雅性清儉兼有武略
公私安靜夷夏懷之授侍中驃騎大將軍開府儀同
三司卒謚曰惠子峻位至車騎大將軍儀同三司峻
弟師蒲州總管府中郎行河東郡事

周書
本傳

杜杲字子暉杜陵人祖建魏輔國將軍父皎武都郡守
杲有當世幹略起家奉朝請累遷修城郡守屬鳳州
人仇周貢等搆亂攻逼修城杲信洽於民部內無畔
者尋開府趙昶諸軍進討杲率郡兵與昶合勢遂破
平之入為司會上士初陳文帝弟頊為質於梁及江
陵平遷長安陳人請之太祖許而未遣至是欲歸之
命杲使焉陳文帝大悅即遣使報聘并賂黔中數州
地以杲奉使稱旨進都督更往分界陳人於是以魯

山歸我帝乃拜項柱國大將軍詔果送之還國果還
朝廷嘉之授大都督治小納言復聘於陳大象二年
加開府儀同大將軍進爵為侯隋開皇二年除西南
道行臺兵部尚書尋卒子運大象末宣納上士

周書
本傳

王子直字孝正杜陵人父琳東雍州長史子直性節儉
有幹能起家奉朝請除太尉府水曹參軍梁人圍壽
春臨淮王元或率軍赴援子直以本官參或軍事與
梁人戰斬其軍主夏侯景超梁人乃退永安初拜鴻

臚少卿魏孝武西遷封山北縣男大統初漢熾屠各
阻兵於南山太祖令子直率步騎討破之除尚書左
外兵郎中進車騎將軍四年從太祖解洛陽圍經河
橋戰兼尚書左丞出為秦州總管府司馬時涼州刺
史宇文仲和據州逆命子直從隴右大都督獨孤信
討平之吐谷渾寇西平以子直兼尚書兵部郎中出
隴右經畧之大破渾衆於長寧川進車騎將軍左光
祿大夫轉并州長史魏廢帝元年拜使持節大都督

行瓜州事子直性清靜務以德政化民西土悅附魏
恭帝初拜黃門郎卒於位子宣禮柱國府參軍事

周書

本傳

竇熾字光成平陵人父略平遠將軍熾性嚴明有謀畧
膂力過人永安元年尔朱榮破葛榮榮别帥韓婁據
薊城不下以熾為都督討之熾手斬婁以功拜揚烈
將軍魏孝武即位梁主遣元樹入寇攻陷譙城熾率
奇兵破之進爵上洛縣伯時帝與齊神武構隙以熾

有威重拜閣內大都督從帝西遷與高金龍戰千秋
門敗之大統元年以從駕功別封真定縣公從擒竇
泰復弘農破沙苑皆有功又從李弼討白額稽胡破
之高仲密來附率兵從太祖援之東魏據中山大破
之追至石濟而還遷車騎大將軍十三年進使持節
驃騎大將軍開府儀同三司涇州刺史魏恭帝元年
茹茹寇廣武熾率兵分討度河至麴使川追及與戰
大破之保定元年進封鄧國公宣政元年兼雍州牧

隋文帝初為相國百官皆勸進熾自以累代受恩不肯署牋時人高其節開皇四年薨謚曰恭子茂嗣

周書

本傳

王悅字衆喜藍田人少有氣幹太祖初定關隴悅募鄉里從軍屢有戰功大統元年除平東將軍封藍田縣伯四年東魏將侯景攻圍洛陽悅又率鄉里千餘人從軍斬獲居多十四年授雍州大中正加衛將軍從大將軍楊忠征隨郡安陸並平之時懸軍深入悅度

路程節減糧食至諸軍匱乏分給之太祖聞而嘉焉
尋拜京兆郡守遷大行臺尚書又領所部兵從達奚
武征梁漢武令悅說其城主楊賢悅貽之書賢遂降
悅說武率輕騎七百徑趣白馬其將梁深以城降梁
州平即以悅行刺史事孝閔踐阼拜使持節驃騎大
將軍開府儀同三司大都督進爵河北縣公悅性儉
約不營生業雖出入榮顯家徒四壁而已世宗手勅
勞勉之保定元年卒於位子康嗣

周書
本傳

毛遐字鴻遠三原人曾祖天愛定州刺史始昌子傳至
遐四世不絕正光中蕭寶夤討關中諸賊以遐為府
長史寶夤敗還長安三輔騷擾遐因辭還北地與弟
鴻賓聚鄉曲豪傑東西畧地氐羌多赴之共推鴻賓
為盟主既而賊帥宿勤買奴自號京兆王遐與鴻賓
縱兵追擊七柵皆平後寶夤構逆謀遐知之乃寄書
與鴻賓索馬迎接復於馬祗柵建旗鼓以拒寶夤攻
其將盧祖遷禽之詔授遐南幽州刺史又攻破其將

侯終德寶寅知內外勢異輕騎走巴中孝武帝入關
稍遷驃騎大將軍儀同三司卒弟鴻賓狀貌頗異昆
季之中尤輕財好施及賊起常與遐一守一戰後拜
岐州刺史明帝以鴻賓兄弟所定處多乃改北地郡
為北雍州三原縣為建中郡以旌其兄弟後亦朱天
光自關中還洛鴻賓領鄉中壯武二千人以從拜西
兖州刺史羈寓倦游之輩四座常滿鴻賓資給衣食
與已悉同轉南青州刺史未幾徵還孝武帝與齊神

武有隙令鴻賓鎮潼關車駕西幸漿糗乏絕鴻賓奉
獻酒食迎於稠桑武帝把其手曰寒松勁草所望於
卿仍留守潼關後神武來寇見禽至并州憂恚卒弟
鴻顯位散騎常侍遐乳母所產也遐養之為弟因姓
毛氏勁悍多力後隨諸兄戰鬪多先鋒陷陣大統四
年為廣州刺史鎮東陽陷東魏卒

北史
本傳

宇文貴字永貴其先昌黎人徙居夏州正光末破六汗
拔圍夏州刺史源子雍嬰城固守以貴為統軍救之

前後數十戰軍中咸服其勇後從汴朱榮擒葛榮於
滏口加別將又從元天穆平邢杲轉都督元顥入洛
從汴朱榮焚河橋力戰有功加征虜將軍大統三年
潁州刺史來降東魏遣堯雄攻潁貴與雄合戰馬中
矢乃短兵步鬪雄大敗走師還進侍中驃騎大將軍
羌人傍乞鐵忽與渭州民鄭五醜扇惑諸羌同反太
祖令貴與豆盧寧史寧討之擒斬鐵忽及五醜朝廷
美其功立碑以紀其績孝閔帝踐阼進位柱國武成

初與賀蘭祥討吐谷渾軍還進封許國公歷遷太保
天和二年薨諡曰穆子善嗣善弟忻驍勇絕倫有將帥才
畧位至上柱國進封英國公忻弟愷少好學雜藝多
通襲祖爵安平郡公起家右侍上士位至上開府

周書

本傳

王雅字度容新閩人少沈毅木訥寡言有胆勇善騎射
周文聞其名召入軍以功賜爵居庸縣子從擒竇泰
於潼關沙苑之戰雅擐甲出戰所向披靡周文壯之

又從戰中山時諸將皆退雅獨拒之敵人見其無繼
步騎競進左右奮擊斬九級敵衆稍退雅乃還周文
嘆曰王雅舉身悉是胆也進爵為伯累遷驃騎大將
軍開府儀同三司明帝初除汾州刺史人庶悅附自
遠至者七百餘家卒於夏州刺史子世積嗣

北史
本傳

李遷哲字孝彥安康人少有識度慷慨善謀畫起家文
德主帥大同二年除安康郡守大統十七年太祖遣
達奚武等畧地山南遷哲率所部拒戰軍敗遂降即

拜車騎大將軍封沌陽縣伯魏恭帝初直州人樂熾等為亂太祖以遷哲信著山南令往經畧熾等或降或獲尋並平蕩仍與敦南出徇地梁巴州刺史牟安民惶懼請降其子宗徹等猶據琵琶城遷哲攻而剋之軍次鹿城主遣使請降遷哲謂其詐梁果於道左設伏遷哲進擊破之自此降款相繼軍還除直州刺史仍令與田弘討信州凡下十八州拓地三千里及旋軍令遷哲留鎮白帝世宗三年進位大將軍四

年詔率金上諸州兵鎮襄陽建德二年進爵安康郡

公三年卒謚壯武子洛嗣

周書本傳

陽雄字元畧上洛邑陽人祖斌位上庸太守雄起家奉朝請累遷至都督積射將軍從于謹攻盤頭柵復從李遠經沙苑陣並力戰有功封安平縣侯後入洛陽戰河橋解玉壁圍迎高仲密援侯景並預有戰功從大將軍宇文虬攻克上津遷通直散騎常侍大都督進儀同三司陳將侯方兒潘純陀冠江陵雄從豆盧

寧擊走之除洵州刺史威惠相濟夷夏安之又置平
州以雄為刺史加驃騎大將軍除通洛防主雄處疆
場務在保境息民接待敵人必推誠仗信入為京兆
尹尋進位大將軍遷江陵總管四州五防諸軍事改
封魯陽縣公宣政元年卒於鎮子長寬嗣官儀同大

將軍

周書
本傳

侯植字仁幹其先上谷人高祖恕為北地太守子孫因
家於三水父欣秦州刺史植容貌奇偉武藝絕倫仕

魏為義州刺史甚有政績後從周文破沙苑戰河橋
進大都督涼州刺史文仲和據州作逆植從開府獨
孤信討禽之封肥城縣公從于謹平江陵進驃騎大
將軍開府儀同三司孝閔踐祚進爵郡公時帝冲幼
晉公護執政陰忌之植懼不免禍遂以憂卒謚曰節

北史
本傳

郭彥陽曲人其先從宦關右遂居馮翊太祖辟為西尚
書佐大統十二年進大都督車騎大將軍時岷州羌

人鐵忽等寇擾西服彥從宇文貴討平之從于謹伐
江陵進驃騎大將軍開府儀同三司孝閔帝踐阼出
為澧州刺史齊南安城主馮顯密遣使歸降宇文貴
令彥率兵應接齊人先令顯送糧南下彥懼其衆不
從命於路邀之顯因得自拔衆果拒戰並擄獲之以
南安無備夜至城下詐稱顯歸門者開門彥引兵而
入遂有其城進懷德縣公以南安懸遠尋令班師除
蒲州總管府長史保定四年從尉遲迴攻洛陽以彥

鎮豫州天和元年除隴右總管府長史四年卒於位

周書

本傳

楊寬華陰人少有大志尚武藝弱冠除奉朝請以功拜
行臺郎中孝莊踐阼拜通直散騎侍郎領河南尹丞
邢杲反寬從上黨王元天穆討平之就拜通直散騎
常侍爾朱兆陷洛陽囚執孝莊寬自成臯奔梁聞孝
莊崩發哀盡禮梁武義之尋禮送還朝孝武初改受
驃騎將軍給事黃門侍郎時夏州戍兵數千據兗州

反詔寬節度諸軍討平之孝武與齊神武有隙召募
騎勇廣增宿衛以寬為閣內大都督專總禁旅從孝
武入關兼吏部尚書錄從駕勲進爵華山郡公大統
十六年朝議經畧漢川梁蕭循固守南鄭寬從大將
軍達奚武討之梁遣楊乾運率兵救循寬等邀擊之
軍至白馬與乾運合戰破之世宗初拜大將軍從賀
蘭祥討吐谷渾破之封宜陽縣公保定元年薨贈華
陝虞上潞五州刺史諡曰元子紀嗣官至上儀同大

將軍

周書本傳

楊紹字子安華陰人祖興魏新平郡守父國中散大夫
紹少慷慨有志畧屢從征伐力戰有功永安中授廣
武將軍直盪別將大統四年出為郿城郡守性恕直
有威惠百姓安之稽胡屢為抄竊紹率郡兵討之屺
馬先登破於默泉之上累遷大都督車騎大將軍復
從達奚武征漢中時梁蕭循固守梁州紹以計誘之
城降以功授輔國將軍中散大夫又從于謹圍江陵

流矢中股力戰不衰事平進驃騎大將軍開府儀同
三司除衡州刺史孝閔帝踐阼進位大將軍保定二

年卒謚曰信

周書
本傳

王傑金州直城人本名文達高祖萬國魏燕州刺史父
巢榆中鎮將傑少有壯志以功名自許善騎射太祖
奇其才擢揚烈將軍加都督嘗曰王文達萬人敵也
復潼關破沙苑爭河橋戰邛山皆以勇敢聞累遷開
府儀同三司從于謹圍江陵時柵內有人善長稍登

者多為所斃，傑射之，應弦而倒。登者乃得入，遂拔之。孝閔踐阼，進爵張掖公、河州刺史。建德初，除涇州總管。傑所歷州府，咸以忠恕為心，為百姓所慕。宣帝即位，拜上柱國、薨，謚曰威子。孝仙位開府儀同大將軍。

周書
本傳

楊乾運字元邈，興勢人。父天興，齊安康守。乾運少雄武，為鄉閭所服。孝昌初，除安康守。梁州民皇甫圓叛，漢中陷。乾運亦入梁。梁大同元年，除西益潼刺史、武陵。

王蕭紀稱尊號拜梁州刺史時紀與湘東王繹爭帝
乾運兄子略勸乾運送款關中太祖密賜乾運鐵券
持節大將軍梁州刺史乾運遂降子端拜梁州刺史
略以歸附功拜車騎大將軍頻從征討建德末位至

儀同大將軍

周書
本傳

楊荐字承畧寧夷人父寶昌平郡守荐性廉謹魏永安
中隨尔朱天光入關討賊封高邑縣男文帝臨夏州
補帳內都督及平侯莫陳悅使荐入洛請事孝武除

荐直閣將軍大統十六年大軍東討文帝恐蠕蠕乘
虛寇掠乃遣荐往諭和好進使持節驃騎大將軍開
府儀同三司加侍中周孝閔帝踐阼仍使突厥結婚
突厥弟阼頭可汗與齊通和說其兄背先約謀以荐
等送齊荐知其意乃正色責之可汗慘然良久然後
發遣我女乃令荐先報命仍請東討以奉使稱旨遷
大將軍保定四年又納幣於突厥還行小司馬又行
大司徒從陳公純等逆女於突厥進爵南安郡公天

和三年遷總管梁州刺史後以疾卒

北史本傳

于實字賓實

謹子京北人

少和厚以軍功封萬年縣子累遷

尚書除渭州刺史恭帝二年羌東念姐反大將軍巨

盧寧討之踰時不克又令實往遂破之孝閔踐阼授

戶部中大夫天和二年延州蒲州賊郝三郎反遣實

討平之除延州刺史進涼州總管開皇元年薨謚曰

安

北史于謹傳

趙文表其先天水人後徙南鄭父江性方嚴有度量歷

官驃騎大將軍昌國縣伯文表少修謹志存忠節魏恭帝元年從田弘征山南復從平巴州信州除梁州長史生獠懷不軌文表討平之遷蓬州刺史政尚仁

恕進爵為公拜吳州總管子海襲爵

周書本傳

隋

賀婁子幹字萬壽本代人隨魏氏南遷世居關右子幹少以驍武知名尉迥作亂子幹從韋孝寬討之每戰先登及破鄴進位上開府開皇元年吐谷渾寇涼州

子幹以行軍總管從上柱國元諧擊之功最高祖慮
邊塞未安即令鎮涼州明年突厥寇蘭州子幹率衆
至可洛峽山阻川為營賊軍不得水數日人馬甚敝
縱擊大破之冊授上大將軍徵拜工部尚書其年突
厥復犯塞以行軍總管從竇榮定擊之斬首千餘級
高祖優詔勞勉吐谷渾復寇邊子幹馳驛至河西發
五州兵掠其國二旬而還俄而虜寇洮岷二州子幹
勒兵赴之賊聞遁去高祖以子幹曉習邊事授榆關

總管歲餘拜雲州刺史後數年突厥遣使請降並獻
羊馬詔以子幹為行軍總管出西北道應接之還拜
雲州總管以母憂去職朝廷以榆關重鎮非子幹不
可起視事卒官謚曰懷子幹兄詮亦有才器至北地

太守

隋書
本傳

蘇沙羅字子粹

孝慈兄子
扶風人

父順周眉州刺史沙羅仕周

釋褐都督後從韋孝寬破尉迴以功授開府儀同三
司封通泰縣公開皇初冉駝羌作亂率兵擊破之後

數載從史萬歲擊西蠻累戰有功進位大將軍尋檢校益州總管長史會越雋人王奉舉兵作亂沙羅從段文振討平之賜奴婢百口卒於家

隋書蘇孝慈傳

史萬歲杜陵人父靜周滄州刺史萬歲少英武善騎射好讀兵書平齊之役其父戰歿萬歲襲爵太平縣公尉迴亂萬歲從梁士彥擊之每戰先登以功拜上大將軍平陳之役又以功加上開府及高智慧等作亂江南萬歲率衆二千踰嶺越海攻陷溪洞前後七百

餘戰轉鬪千餘里還拜左領軍將軍南寧夷爨翫復
叛萬歲皆擊破之度西洱河入渠濫川破其三十餘
部擄獲男女二萬餘口諸夷大懼遣使請降以功進
位柱國開皇末突厥頭達可汗犯塞漢王諒與萬歲
出馬邑道頭達聞之懼而引去萬歲馳追百餘里乃
及大破之楊素害其功會窮東宮黨與上問萬歲所
在楊素見上方怒因曰萬歲謁東宮矣上大怒命左
右搆殺之萬歲為將不治營伍令士卒各隨所安無

警夜之備敵亦不敢犯臨陣對敵應變無方號為良

將

隋書
本傳

劉方長安人性剛決有胆氣仕周以戰功拜上儀同高
祖為丞相方從韋孝寬破尉迴於相州開皇三年從
衛王爽破突厥於白道進位大將軍仁壽中交州人
李佛子作亂上詔方為行軍總管進兵臨佛子佛子
降尋授驩州道行軍總管經畧林邑軍至海口林邑
王梵志遣兵守險方擊走之師次閤黎江賊據南岸

乘象四面而至方以弩射象因攻破之俘馘萬計進至大綠江賊據險為柵又擊破之至其國都林邑王梵志棄城奔海刻石紀功而還方在道遇患卒帝甚

傷惜之贈上柱國盧國公子通仁嗣

隋書本傳

王世積新國人父雅周使持節開府儀同三司世積容貌魁岸腰帶十圍風神爽拔有傑人之表在周有軍功拜上儀同封長子縣公高祖為丞相尉迴作亂從韋孝寬擊之每戰有功拜上大將軍高祖受禪進封

宜陽郡公高頴美其才能甚善之授蘄州總管平陳
之役以舟師自蘄水趣九江與陳將紀瑱戰於蘄口
大破之以功進位柱國後數歲桂州人李光仕作亂
世積以行軍總管討平之進位上柱國遼東之役世
積與漢王並為行軍元帥至柳城遇疾疫而還拜涼
州總管令騎士七百人送之官未幾其親信安定皇
甫孝諧有罪吏捕之亡抵世積世積不納由是有憾
因徵幸上變由是被徵入朝按其事竟坐誅

隋書
本傳

李徹字廣達巖綠人父和開皇初為柱國徹性剛毅有
器幹多武藝大冢宰宇文護引為親信累遷儀同三
司武帝時從皇子征吐谷渾以功賜爵同昌縣男從
帝拔晉州復從破齊師於汾北下高壁拔晉陽擒高
潛於冀州俱有力焉高祖受禪加上開府突厥沙鉢
略犯塞上令衛王爽為元帥以徹為長史遇虜於白
道掩擊大破之沙鉢略屈膝稱藩未幾沙鉢略為阿
拔所侵上疏請援以徹為行軍總管率精騎赴之阿

拔聞而遁去開皇十年進位柱國後突厥犯塞徹復
領行軍總管擊破之高頻得罪徹素與頻善上賜宴

遇鵠而卒

隋書
本傳

杜整字皇育杜陵人祖盛魏直閣將軍潁川太守父闕
渭州刺史整少有風槩九歲丁父憂哀毀骨立事母
以孝聞及長驍勇有膂力好讀孫吳兵法魏大統末
襲爵武鄉侯高祖受禪加上開府進封長廣郡公開
皇六年突厥犯塞以整為行軍總管至合川無兵而

還密進取陳之策上善之於是以行軍總管鎮襄陽
尋病卒謚曰襄子楷嗣官至開府整弟肅少有志行

開皇初為通直散騎常侍北地太守

隋書
本傳

龐晃字元顯榆林人父虬周驃騎大將軍晃少以良家
子補州都督周太祖既有關中署晃大都督後遷驃
騎將軍轉車騎將軍高祖踐阼加上開府進爵為公
河間王弘擊突厥晃以行軍總管出賀蘭山擊賊破
之斬首千餘級遷原州總管仁壽中卒官子長壽頗

知名官驃騎將軍

隋書
本傳

杜彥雲中人父遷徙家於幽彥性勇果善騎射仕周左
侍上士擊陳將吳明徹於土州破之又擊叛蠻進平
郢州賊帥樊志以戰功拜大都督賜爵永安縣伯從
韋孝寬擊尉迴於相州每戰有功封襄武縣侯開皇
初進爵為公平陳之役以行軍總管渡江擊南陵城
拔之擒其守將許翼進位柱國賜子寶安爵昌陽縣
公高智慧作亂復從楊素討之別解江州圍智慧餘

黨屯聚溪洞彥水陸兼進斬其渠帥賊李陟擁衆數
千據彭山彥襲擊破之斬陟傳其首又擊徐州宜豐
二洞悉平之拜洪州總管甚有治名歲餘徵拜雲州
總管突厥來寇彥輒擒斬之北夷畏憚不敢至塞拜
朔州總管突厥復寇雲州以彥素為突厥所憚復拜
雲州總管未幾以疾徵還卒

隋書
本傳

于仲文

義兄子
京兆人

字次武父實周大左輔仲文性倜儻有

大志為固安太守聰察明斷累勲授儀同三司東郡

太守尉迴作亂遣將檀讓誘致仲文仲文拒之迴遣
宇文威攻之仲文大破威衆迴又遣將復攻仲文自
度不支棄妻子潰圍遯達於京師迴屠其三子一女
高祖見之進位大將軍領河南道行軍總管軍至東
倪搆與迴將劉子昂等相遇進擊破之軍次蓼隄讓
擁衆數萬仲文以羸師挑戰偽北讓軍頗驕於是遣
精兵左右翼擊之大敗讓軍進攻梁郡擊曹州檀讓
以餘衆屯城武仲文選精騎襲之拔城武迴將席毗

羅十萬衆屯沛縣其妻子在金鄉仲文詐為毗羅使者謂金鄉城主曰檀讓明日到金鄉賞將士仲文簡精兵偽建迴旗幟遂取金鄉毗羅來薄官軍仲文結陣設伏毗羅軍大潰河南悉平進位柱國明年拜行軍元帥擊胡斬首千餘級至護軍川與虜遇可汗見軍容齊肅不戰而退後突厥犯塞仲文大破賊而還煬帝即位從帝討吐谷渾進位光祿大夫遼東之役高麗出兵掩襲輜重仲文大破之東至薩水宇文述

以兵餒退歸師遂敗績帝大怒繫仲文仲文憂恚發

病卒

隋書
本傳

史祥字世休朔方人父寧周少司徒祥少有文武才幹
仕周爵武遂縣公高祖踐阼領交州事頗有惠政伐
陳之役從王世積以舟師出九江道與陳人合戰破
之進拔江州進位上開府後以行軍總管從晉王廣
擊突厥於靈武破之仁壽中率兵屯弘化以備胡煬
帝即位漢王諒作亂帝以祥為行軍總管軍於河陰

久不得濟祥乃令軍中修攻具簡精銳於下流潛渡
於是其衆大潰祥縱兵乘之殺萬餘人進位上大將
軍從征吐谷渾祥率衆出間道擊虜破之俘男女千
餘口進位左光祿大夫拜燕郡太守被賊高開道所
圍城陷送祥於涿郡卒於塗有子義隆永年令祥兄
雲字世高弟威字世武並有幹局

隋書
本傳

魚俱羅下邳人身長八尺膂力絕人從晉王廣平陳以
功拜開府楊素率兵擊突厥路逢俱羅奏與同行及

遇賊俱羅與數騎奔擊瞋目大呼出左入右往返若
飛以功進位柱國拜豐州總管以交通內臣坐除名
未幾越雋飛山蠻作亂詔俱羅白衣領將討平之大
業九年重征高麗以俱羅為碣石道軍將及還江南
劉元進作亂詔俱羅將兵向會稽諸郡逐捕之戰無
不捷然賊勢寢盛敗而復聚朝廷發使案驗大理司
直梁敬正奏俱羅師徒敗歟於是斬東市

隋書
本傳

薛世雄字世英本汾陰人其先寓居關中父回開皇初

封舞陰郡公領漕渠監世雄年十七從周武帝平齊
開皇時數有戰功累遷車騎將軍煬帝嗣位番禺夷
獠相聚為亂詔世雄討平之世雄性廉謹行軍破敵
秋毫無犯與突厥啟民可汗連兵擊伊吾初不
設備聞世雄已度磧大懼請降李密逼東都詔世雄
率幽冀精兵擊之軍次河間欲討竇建德建德自選
精銳數百夜來襲之於是大敗慚恚病卒時六十三

隋書
本傳

閻毘盛樂人祖進魏本郡太守父慶周上柱國寧州總
管毘七歲襲爵石保縣公及長儀貌矜嚴頗好經史
煬帝嗣位自洛口開渠達於涿郡以通漕運毘督其
役及征遼東以本官領虎賁郎將典宿衛時衆軍圍
遼東城帝令毘詣城下宣諭賊弓弩亂發所乘馬中
流矢毘顏色不變辭氣抑揚卒事而去會楊玄感作
逆帝班師從至高陽暴卒

隋書
本傳

唐

劉文靜字肇仁世居武功儻有器畧大業末為晉陽令與晉陽宮監裴寂善高祖鎮太原文靜深自結俄坐李密姻屬繫獄秦王私入視之文靜挑言曰上南幸盜賊蟬結真主取而用之一朝名號十萬眾可得鼓而入關王業成矣王乃陰部署賓客恐唐公不從文靜謀因裴寂開說唐公私可乃起兵以文靜為司馬文靜請與突厥連和從之尋拒屈突通於潼關與其將桑顯和苦鬪文靜以奇兵從後掩之顯和敗績

進光祿大夫魯國公唐公踐位授民部尚書文靜自
以才能遠過裴寂而寂居其上意不平會文靜妾兄
上變遂下吏秦王以文靜首決非常宜全宥帝素疏
忌之寂又言文靜權詭猜險恐為後憂遂殺之貞觀
三年追復官爵子樹義襲魯國公

唐書
本傳

李高遷岐州人客太原唐公引致左右執高君雅等有
功以右三統軍從下霍邑圍長安力戰遷左武衛大
將軍江夏郡公檢校西隣州刺史突厥寇馬邑高滿

政請救詔高遷督兵助守後歷資州刺史卒

唐書本傳

李安遠夏州人父徹隋上柱國雲州刺史安遠襲爵城陽公後補正平令兵起攻絳州安遠嬰城拒守唐公素與安遠善及拔絳撫慰其家授右翊衛統軍復從破屈突通進上柱國右武衛大將軍數從秦王征討積功累封至廣德郡公奉使吐谷渾安遠與約和吐谷渾乃請為互市邊場利之隱太子將亂陰使誘動安遠介無貳志秦王益親重貞觀初嘗命統邏騎都

下督盜賊歷潞州都督懷州刺史皆以幹用顯卒謚

曰安

唐書
本傳

公孫武達櫟陽人以豪俠稱為隋驍果兵興武達從秦
王討劉武周苦戰功多累遷秦府右三軍驃騎封清
水縣公貞觀初為肅州刺史突厥入寇武達以精兵
二千人與戰虜稍却復殊死鬪薄之張披河潛命上
流度兵虜已半濟乃兩岸夾擊斬溺殆盡壘書勞之
遷左監門將軍鹽州突厥叛詔武達趨靈州追及賊

斬其帥可邏拔扈進封東萊郡公終右武衛大將軍

陪葬昭陵謚曰壯

唐書本傳

張長遜櫟陽人精馳射在隋以平陳功累遷五原郡守
義兵起以郡降拜安化郡公徙封范陽時梁師都薛
舉請突厥兵南渡河長遜矯作詔與莫賀咄設以代
其謀會唐使亦至突厥兵不出武德元年討薛舉不
待命輒引兵會賜錦袍金甲入朝授右武衛將軍徙
息國公檢校益州行臺歷遂夔二州總管貞觀十一

年卒

唐書
本傳

張平高綏州人為隋鷹揚府校尉戍太原遂預謀議從

唐公平京城累授左領軍將軍封蕭國公貞觀初為

丹州刺史坐事以右光祿大夫還第卒

唐書
本傳

屈突通其先昌黎人後家長安仕隋為虎賁郎將擢左

武衛將軍涖官正勁有法其弟蓋為長安令亦以方

嚴顯通大業中與宇文述共破楊玄感以功遷左驍

衛大將軍秦隴盜起授關內討捕大使安定人劉迦

論反衆十餘萬通發關中兵擊之候其無備夜簡精卒襲破之斬迦論並首級萬餘築京觀於上郡南山高祖起代王遣通守河東高祖濟河通自武關趨藍田以援長安至潼關阻劉文静兵不得進相持月餘留桑顯和保潼關率兵將如洛既行而顯和降通遂被禽送長安帝曰忠臣也釋之授兵部尚書蔣國公為秦王行軍元帥長史從平薛仁果時賊珍用山積諸將爭得之道獨無所取從討王世充竇建德來援

秦王分麾下兵以屬通俾與齊王圍洛世充平論功
第一拜陝東道大行臺鎮東都貞觀初為洛州都督
進左光祿大夫卒謚曰忠子壽襲爵太宗幸洛思通
忠節銓以少子拜果毅都尉終瀛州刺史銓子仲翔

神龍中復守瀛州

唐書
本傳

劉弘基池陽人大業末陰事高祖又察太宗資度非常
益自託兵將舉弘基募士得二千人從攻下西河宋
老生敗棄馬投塹弘基斬其首拜右光祿大夫師至

蒲引兵先濟河下馮翊為渭北道大使西徇扶風衆至六萬南度渭次長安故城隋將衛文昇來拒弘基逆擊擒甲士千餘馬數百京師平功第一授右驍衛大將軍劉武周犯太原從秦王屯栢壁以勁卒二千由隰州趨西河躡賊歸路及宋金剛遁走率騎尾之介休與王合擊大破之累封任國公從擊劉黑闥還除并鉞將軍貞觀初授衛尉卿改封夔國太宗征遼召為前軍大總管戰駐蹕山有功累加封戶卒謚曰

襄子仁實襲封

唐書本傳

實德明

德元兄
平陵人

師事陳留王孝逸通知文史漢王諒反

遣將攻黎陽德明年十八募士五千擊賊破之以功

擢累齊王府屬長安平謁高祖拜考功郎中從擊王

世充歷常愛二州刺史

唐書實
威傳

殷開山名嶠鄆人為隋大谷長高祖兵起召補大將軍

掾從攻西河為渭北道元帥長史時關輔羣盜驚力

自張開山招慰皆下與劉弘基破衛文昇兵賜爵陳

郡公遷丞相府掾以吏部侍郎從秦王討薛舉為舉
所敗除名頃之從平仁果復爵位兼陝東道行臺兵
部尚書遷吏部從討王世充以功進爵鄖國公征劉
黑闥道病卒王哭之慟謚曰節

唐書
本傳

竇軌字士則

咸兄子
平陵人

父恭仕周為雍州牧軌性剛果有

威高祖起兵軌募衆千餘人迎謁長春宮帝大悅使
略地渭南下永豐倉從平京師為大丞相諮議參軍
稽胡賊掠宜春詔軌討之斬首千級獲男女二萬赤

排羌與鐘俱仇寇漢中拜秦州總管連戰有功餘黨
悉降遷益州道行臺左僕射黨項吐谷渾寇松州軌
進軍臨洮擊走其衆屯田松州明年還蜀軌既貴益
嚴酷然能自勤苦每出師臨敵身未嘗解甲其下有
不用命即誅由是蜀盜悉平行臺廢授益州都督貞
觀元年詔授右衛大將軍洛州刺史周洛間因隋亂
人不土著軌下令諸縣有游手末作者按之由是威
信大行民皆趨本第琮有武幹大業末犯法亡命太

原依高祖大將軍府建引為統軍從平西河破霍邑
授紫光祿大夫從劉文靜擊屈突通於潼關敗其
將桑顯和遁去琮以輕騎追獲於稠桑進兵下陝
縣拔太原倉遷左領軍大將軍武德初為右屯衛大
將軍時將圖洛陽詔琮留守陝護餉道王世充將羅
士信數以兵鈔絕琮使人說降東都平檢校晉州總
管從隱太子平劉黑闥以功封譙國公卒諡曰敬
唐書

實威
傳

丘行恭

和子
郿人

善騎射大業末與師利聚兵萬人保郿城

人多依之羣盜不敢窺境後原州奴賊圍扶風行恭率五百人詣營奴帥長揖行恭手斬之乃率其衆與師利迎秦王於渭北拜光祿大夫累從戰伐功多遷左一府驃騎錫勞甚厚隱太子誅以功擢左衛將軍貞觀中從侯君集平高昌封天水郡公進右武侯將軍軍高宗立遷大將軍冀陝二州刺史致仕卒諡曰襄陪葬昭陵初從討王世充太宗與諸騎相失惟行恭

從賊騎追及流矢著太宗馬行恭回射之發無虛鏃賊不敢前遂下拔箭以已馬進太宗步執長刀大呼導之斬數人突陣而還貞觀中詔鑿石為人馬象拔

箭狀立昭陵闕前以旌武功云

唐書本傳

李子和蒲城人本郭氏為隋左翊衛以罪徙榆林大業末自稱永樂王有騎兵二千南連梁師都北事突厥武德元年獻款授靈州總管襲師都寧朔城克之又伺突厥虛實陰以章聞為敵邏騎所獲於是子和危

畏南徙詔內延州故城五年從平劉黑闥有功賜姓
拜右武衛將軍顯慶初轉黔州都督乞骸骨許之進

光祿大夫卒

唐書
本傳

龐玉涇陽人事隋為監門直閣李密據洛口玉以關中
銳兵屬王世充擊之百戰不衄世充歸東都秦王東
徇洛玉率萬騎降高祖以隋舊臣禮之玉魁梧有力
明軍法授領軍武衛二大將軍出為梁州總管巴山
獠叛玉集其首餘黨四奔屬縣玉下令軍中曰非盡

賊不反賊營斬渠長以降召為監門大將軍太宗以
耆厚令主東宮兵雖老不怠小大之務無不親卒帝

為廢朝

唐書龐
堅傳

薛萬均本燉煌人後徙咸陽大業末以材武為羅藝所
厚善與藝歸款高祖授上柱國永安郡公竇建德寇
范陽萬均教藝羸兵阻水以誘之自以精騎匿城左
建德師度水邀半度擊之大敗其衆明年建德以二
十萬騎來攻萬均率死士百人出地道掩擊其背衆

驚潰去柴紹討梁師都以萬均為副斬其驍將敵陣
謹乘之俘殺相藉突厥走遂圍師都賊斬師都降從
李靖討吐谷渾軍次青海萬均以百騎行前與敵遇
單騎馳突斬數千級追奔至積石山大風折旗萬均
曰敵且來乃勒兵俄而敵至萬均直前斬其將衆遂
潰追至圖倫磧乃還遷本衛大將軍又副侯君集擊
高昌進潞國公弟萬淑以戰功歷暢武道行軍總管
萬備以尚輦奉御從伐高麗將軍契苾何力中掣萬

備單馬進救何力獲免歷左衛將軍

唐書本傳

劉世讓字元欽醴泉人仕隋為徵仕郎高祖入長安以
漳川歸授通議大夫時唐弼餘黨寇扶風世讓自請
安輯得其衆數千因授安定道行軍總管率兵二萬
拒薛舉舉平授彭州刺史俄領陝東道行軍總管獨
孤懷恩有逆謀世讓亡歸白發之封弘農郡公竇建
德援王世充世讓率騎出黃沙嶺襲洛州突厥入寇
詔以兵屯鴈門世讓馳騎八百赴之保武州城壞立

柵完拒可汗來說世讓叱之敵引去授廣州總管帝
問備邊策答曰突厥數南寇恃有馬邑如使勇將屯
崞城厚儲金帛以招降者數出奇兵畧城下踐禾稼
不踰歲馬邑可圖帝乃使馳驛經畧世讓至馬邑高
滿政以地來降突厥縱反間帝不察因誅之貞觀初
突厥降者言世讓無逆謀乃原其妻子

唐書
本傳

韋雲起萬年人隋開皇中以明經補符璽直長大業初
改謁者契丹寇營州詔雲起護突厥兵討之啟民可

汗以二萬騎受節度雲起離為二十屯既入境使突厥給契丹引而南過賊營百里夜還陣掩擊之獲契丹男女四萬拜治書御史高祖入闕授司農卿陽城縣公武德初進上開府儀同三司判農圃監突厥入寇詔總幽寧以北九州兵禦之得一切便宜改益州行臺兵部尚書時僕射竇軌奏生獠反冀得集兵以威衆雲起數持掣由是始隙雲起弟事隱太子太子死軌疑雲起有變陰設備遂殺之孫方實光宅初為

地官尚書嘗屬疾武承嗣兄弟往候方質據床自若
或曰倨見權貴且速禍答曰吉凶命也丈夫豈能折
節近戚以苟免耶俄為酷吏所陷流死

唐書
本傳

蘇烈字定方武邑人後徙始平父邕當隋季率里人為
本郡討賊定方驍悍有氣決從父戰數先登陷陣邕
卒代領其衆破劇賊張金稱楊公卿追北數十里自
是賊不舍境鄉黨賴之貞觀初為匡道府折衝從李
靖襲突厥頡利為前鋒去賊一里許見牙帳馳殺數

百人頡利遁去餘黨悉降再遷左衛中郎將與程名振討高麗破之拜右屯衛將軍從程知節征賀魯定方馳擣賊營賊衆大潰擢伊麗道行軍大總管復征賀魯斬首數萬級賊大奔明日振兵後進賀魯西走定方領新附兵絕其後會大雪吏請少休定方曰敵恃雪方止舍謂我不能進若縱使遠遁則莫能禽遂勒兵進至雙河距賀魯所百里下令陣而行薄金牙山定方縱擊破其牙下數萬人縛賀魯以還由是修

亭障列蹊隧定疆畛問疾收苛唐之州縣極西海矣
高宗臨軒定方戎服奉賀魯以獻策功拜左驍衛大
將軍邢國會都曼叛詔定方為安撫大使定方選
精卒襲之都曼驚戰遂大敗走馬保城師進攻之都
曼計窮遂而縛降葱嶺以西遂定遷左武衛大將軍
出為神丘道大總管率師討百濟自城山濟海直趨
真都城王義慈降定方所滅三國皆生執其王未幾
為遼東道行軍大總管破高麗園平壤拜涼州安集

大使定吐蕃吐谷渾乾封二年卒諡曰莊

唐書本傳

崔敦禮字安上祖仲方隋禮部尚書其先博陵著姓魏末徙咸陽敦禮博涉書傳以節義自將武德中官通事舍人善辭令進止嘗持節召廬江王瑗瑗已舉兵執之脅問朝廷事敦禮不為言太宗壯之除左衛郎擢中書舍人遷兵部尚書詔撫輯回紇鐵勒部姓會薛延陀寇邊與李勣合兵破之置和連州處其餘衆回紇吐迷度為下所殺詔往綏定立其嗣而還敦禮

通知四夷情偽少慕蘇武為人屢使突厥前後建明
允會事機永徽四年拜侍中進中書令以久疾不任
事更拜同中書門下三品卒謚曰昭弟餘慶位亦至

兵部尚書

唐書
本傳

楊弘禮字履莊華陰人隋尚書令素弟之子高祖即位
以素有功於隋詔弘禮襲清河郡公除太子通事舍
人太宗征遼東拜兵部侍郎駐驛之役領步騎二十
四軍跳出賊背所向摧靡帝自山下望其衆謂許敬

宗曰越公兒郎故有家風還拜中書侍郎遷司農卿
為崑丘道副大總管破處密殺焉者王降馭支部獲
龜茲于闐王凱旋會帝崩大臣疾之下遷涇州刺史
永徽初追論其功遷勝州都督改太府卿卒謚曰質

唐書
本傳

和逢堯岐山人武后時舉進士高第擢監察御史突厥
默啜請尚公主逢堯以御史中丞攝鴻臚卿報可默
啜遣貴近頡利來曰詔送金鏤鞍具乃塗金使者不

可信雖得公主猶非實請罷和親欲馳去左右色動
逢堯呼其人謂曰送鞍具欲安且久不以金為貴可
汗貴金不貴信耶默啜聞因備禮以見逢堯說曰天
子思與可汗通舊好可汗當嚮風慕義襲冠冕取重
諸蕃默啜信之為斂髮紫衣南面再拜稱臣遣子入

朝逢堯擢戶部侍郎唐興奉使者稱逢堯

唐書本傳

杜希望

俗父萬年人

重然諾所交游皆一時俊傑為安陸令

都督宋慶禮表其異政開元中署靈州別駕關內道

度支判官自代州都督召還屬吐蕃攻勃律勃律乞
歸李林甫方領隴西節度拜希望鄯州都督知留後
馳傳度隴破烏菴衆斬千餘級進拔新城擢鴻臚卿
置鎮西軍希望引師部分塞下吐蕃懼遺書求和希
望報曰受和非臣下所得專敵悉衆爭壇泉希望大
小戰數十俘其渠魁至莫門焚積蓄卒城而還時軍
屢興府庫虛寡希望居數歲芻粟金帛豐餘希望愛
重文學門下所引如崔顥等皆名重當時

唐書杜佑傳

蕭嵩

耀子長安人

開元初擢中書舍人姚崇稱其遠到歷宋

州刺史遷尚書左丞十四年以兵部尚書領朔方節
度使會吐蕃陷瓜州回紇又殺涼州守將王君奭河
隴大震徙嵩河西節度使判涼州事嵩表裴寬郭虛
已牛仙客置幕府以建康軍使張守珪為瓜州刺史
完樹陴塢懷保邊人於時悉諾邏恭祿威愴諸部吐
蕃倚其健噬邊嵩乃縱反間示疑端贊普果誅之使
悉末明攻瓜州守珪拒甚力虜引卻會鄯州都督張

志亮破賊青海西嵩又遣副將杜賓客與吐蕃戰和
連城下斬一將虜哭震山谷露布至帝大悅授嵩同
中書門下三品十七年進兼中書令遙領河西節度
在公慎密人莫見其際久之進太子太師固請老見
許天寶八載卒子華謹重方雅有家法嗣爵天寶末
為兵部侍郎祿山亂陷賊逼守魏州華間道奉表欲
舉魏以應為賊所執會崔光遠得魏州破械出之有
詔即授刺史擢河中晉絳節度使上元初同平章事

李輔國用事求宰相華拒之輔國怨貶華為峽州司

馬卒

唐書蕭瑀傳

賈師順

岐人

悉諾邏并兵攻城使早降師順不可賊數日

又說師順曰明府不降吾衆且還宜有以贈我師順
請脫士卒衣襦悉諾邏知無有乃夜撤營去毀瓜州
師順開門收器械復完守備吐蕃果使精騎還襲見
有備乃去以功遷鄯州都督隴右節度使師順岐州

人終左領軍將軍

唐書王
奂傳

郭晞華州人善騎射從征伐有功復兩京戰最力出奇
兵破賊累進鴻臚卿河中軍亂子儀召首惡誅之支
黨猶反仄晞選親兵晝夜警以備非常姦人不得發
以功拜殿中監吐蕃回紇入寇加御史中丞領朔方
軍援邠州與馬璘合軍擊敵破之敵復來陣涇水北
子儀遣晞率徒兵五千騎五百襲敵晞以兵寡不進
須暮賊半濟乃擊斬首五千級加御史大夫子儀固
讓乃止居父喪值朱泚亂南走山谷賊畀致之欲汙

以官佯瘡不答賊露兵脅之不動數以城中事貽書
李晟既而奔奉天天子還改太子賓客累封趙國公

卒

唐書郭
子儀傳

馬璘扶風人少孤讀漢馬援傳至丈夫當死邊野以馬
革裹尸歸慨然曰使吾祖勲業墜地乎開元末挾策
從安西節度府以奇勞累遷金吾衛將軍至德初王
室多難統精甲三千赴鳳翔肅宗委以東討初戰渭
南以百騎破賊五千衆從李光弼攻洛陽史朝義衆

十萬陣北邙山璘率部士五百薄賊屯出入三反衆
披靡賊遂潰明年吐蕃寇邊詔璘移軍援河西懷恩
之叛璘間關轉鬪至鳳翔敵圍已合璘突入縣門不
解甲出戰背城陣敵潰率輕騎追之斬數千級擢御
史大夫永泰初拜四鎮行營節度南道和蕃使俄檢
校工部尚書北庭行營鄯寧節度使大厯八年吐蕃
內寇渾瑊戰宜祿不利璘設伏潘原與瑊合擊破之
俘級數萬進檢校尚書右僕射明年入朝進扶風郡

王十一年卒於軍謚曰武

唐書
本傳

李抱玉本安興貴孫世居河西為人沈毅有謀尤忠謹
祿山亂守南陽斬賊使至德二載上言恥與逆臣同
姓詔賜姓徙籍京兆擢陳鄭潁亳節度使史思明已
破東都自謂無前李光弼壁河陽拒之使抱玉守南
城賊急攻抱玉縱奇兵表裏俘殺甚衆賊乃捨去封
樂城公代宗立徙涼國公進司徒吐蕃入寇帝次陝
羣盜徧南山五谷間詔抱玉討賊不閱旬五谷平詔抱

玉權鳳翔隴右節度使失之加山南西道副元帥節度使屯盤屋抱玉在鎮禁暴安人為將臣之良卒謚昭武從父弟抱真沈慮而斷抱玉屬以軍事授汾州別駕僕固懷恩反陷焉挺身歸京師遷陳鄭澤潞留後德宗嗣位領昭義節度使田悅反圍邢洺詔抱真救之敗悅於雙岡又破之臨洺進圍魏悅大敗會朱滔王武俊救悅抱真退保魏興元初進義陽郡王朱滔圍貝州抱真遣客說武俊武俊猶豫抱真自造其壁約為昆弟旦日合

戰大破滔進檢校司空貞元初卒子緘匿喪其屬元仲經詭抱真令請已節付緘天子遣使者馳入軍詔以事屬大將王延貴護緘赴東都贈抱真太保

唐書本傳

來瑱永壽人父曜著名西邊終右領軍大將軍瑱畧知書尚名節崖然有大志天寶初充招討使安祿山反拜汝南太守未行改潁川賊攻潁川瑱手射賊皆應弦仆前後俘殺甚衆以功加防禦使徙山南東道節度使瑱能撫訓士舉動安重賊不得侵改淮南西道

節度兩京平封潁國公上元二年春破史思明餘黨
於魯山俘賊渠又戰汝州獲馬牛橐駝凡兩戰斬首
萬級入朝拜兵部尚書同平章事時程元振疾瑱告
與巫祝言不順帝怒下詔賜死籍其家廣德元年追

復官爵

唐書
本傳

辛雲京金城人客籍京兆世為將家雲京有膽決積功
遷特進太常卿史思明屯相州雲京以銳兵四千襲
滏陽追破其衆授開府儀同三司加代州都督鎮北

兵馬使授太原尹進封金城郡王雲京治謹於法下有犯雖絲毫不貸及賞功亦如之故軍中畏而信回紇恃舊勲每入朝所在暴鈔至太原畏不敢惕息數年太原大治加檢校尚書右僕射同平章事大厯三年檢校左僕射卒謚忠獻從弟京果信安王禕節度朔方京果與弟旻以策干禕評咨加異後從李光弼出井陘督趨盩先驅戰嘉山尤力肅宗異之召見曰點彭闕張之流乎累遷鴻臚卿代宗立封庸國公遷

左金吾大將軍進晉昌郡王歷湖南觀察使後為工部尚書致仕朱泚盜京師以老病不能從西嚮慟而卒贈太子少保旻亦從光弼定恒趙後署太原三城使史思明屯相軍及滏陽旻逆擊走之東都陷退守

河陽卒於屯

唐書本傳

楊朝晟字叔明夏州朔方人興行間以先鋒功授甘泉府果毅建中初從李懷光討劉文喜涇州斬獲多加驃騎大將軍李納寇徐州從唐朝臣往討常冠軍懷

光赴難奉天屬朝晟兵千人下咸陽賜實封百五十
戶懷光反賊黨張昕守邠州大索軍實多募士欲潛
歸之朝晟父懷賓夜以數十騎斬昕及同謀者朝晟
泣見懷光懷光繫之懷光平帝原朝晟為游瓌都虞
候吐蕃犯邊游瓌自將守寧州軍亂朝晟謀誅首惡
二百餘人加御史大夫貞元九年城鹽州發卒護境
朝晟屯木波堡為邠寧節度使朝晟請城方渠合道
木波以遏吐蕃路帝納其策已城吐蕃悉衆至度不

能害乃引去復城馬嶺而歸開地三百里十七年卒

於叱

唐書本傳

韋臯字城武萬年人擢監察御史張鎰節度鳳翔以侍御史知隴州行營留事德宗狩奉天朱泚部將牛雲光謀劫以臣泚遇泚奴使臯所以御史中丞授臯臯偽受泚詔明日置酒大會奴雲光至伏甲盡殺之泚復使他奴拜臯節度使臯亦斬之縱一人使報泚帝聞授臯隴州刺史置奉義軍拜節度使寵其功士氣

益壯又馳使吐蕃與連和隴坻遂安貞元初為劍南
西川節度使初雲南蠻羈附吐蕃臯計得雲南則斬
吐蕃右支乃間使招徠之稍稍通西南夷又明年雲
南款邊求內屬絕吐蕃盟五年臯與蠻共破吐蕃於
臺登屯柵以次降定九年天子城鹽州策吐蕃且來
撓詔臯出師牽之以為檢校尚書右僕射於是西山
八國部長皆因臯請入朝乃遣幕府崔佐時由石門
趣雲南南詔復通詔臯統押近界諸蠻西山八國雲

南安撫使俄進同平章事十三年復雋州吐蕃擾邊
臯輒破却之贊普怒遂北掠靈朔破麟州帝詔臯深
入以撓虜十月大破吐蕃遂圍維州吐蕃釋靈朔兵
使論莽熱率衆十萬來救師伏以待生禽莽熱獻諸
朝帝悅進檢校司徒兼中書令南康郡王製紀功碑
褒賜之順宗立王叔文等于政臯上表請皇太子監
國又上牋太子暴叔文佐之姦且勸進會大臣繼請
太子遂受禪是歲卒謚忠武臯治蜀二十一年其功

烈為西南劇善拊士臯沒蜀人德之見其遺像必拜
弟平與臯斬朱泚使者間走奉天上功擢萬年尉

唐書

本傳

趙植

隱祖奉天人

德宗出狩變倉卒羽衛單寡朱泚攻城急

植率家人奴客以死拒守獻家財勞軍帝嘉之賊平

渾瑊引在幕府累擢鄭州刺史鄭滑節度使李融奏

以自副融疾病委以軍政大將宋朝晏火其營夜為

亂植列卒不動頃之遲明而潰捕斬皆盡優詔嘉慰

累擢嶺南節度使終於官

唐書趙隱傳

孫惟最

德昭父
五原人

有才略黃巢陷長安惟最率鄉里子弟

得義兵千人南攻巢於咸陽州將壯其所為益以兵

二千以破賊功拜右金吾大將軍朱玫亂京師僖宗

幸興元惟最率兵擊賊累遷鄜州節度使留京師宿

衛鄜州將吏詣闕請惟最之鎮京師民數萬與神策

軍復遮留不得行改荆南節度使卒

五代史孫
德昭傳

陝西通志卷五十八